



Inatsisartuni ilaasortaq Steen Lyng, Demokraatit

Nassiunneqartuq e-mail atorlugu, uunga: inatsisartut@inatsisartut.gl

Akissuteqaat, § 37 naapertorlugu apeqquteqaatinut qarasaasiaqarfinnik Naalakkersuisut pilerisaaralutik ingerlatsinerat pillugu

06-03-2020
Sagsnr. 2020 - 3893

Inatsisartut suleriaasianni § 37 imm. 1 naapertorlugu Naalakkersuisunut apeqquteqarputit Naalakkersuisut suliniutaat qarasaasiaqarfinnik nutaanik pilersitsisoqarsinnaaneranut ingerlatsisoqalersinnaanerannullu tunngatillugu. Apeqqutigisatit uannut akisassanngortinneqarput, akissutillu uani ataaniipput.

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Apeqqut 1:

Tuniniaanermi annertusaanermi atortussiap (markedsføringsmateriale) 'Doing Business In Greenland'-p saniatigut qarasaasiaqarfinnik pilersitsinissamut ingerlatsinermullu sulialinnik suliffeqarfinnut nutaanut pilerisaarillutik Naalakkersuisut sorlernik aallartitsisimappat?

Akissut:

Ukiut 40-ut sinnerlugit erngup nukinganik iluaqutigineqarsinnaasunut pisuussutitut paasissutissanik nunatsinni katersuisoqarnikuvoq, tamannalu isumaqarpoq uagut nunatsinni erngup nukinganik iluaquteqarsinnaaneq pillugu paasissutissanik amerlasuunik katersisimasugut.

Ilisimasat tamakkua ilaatigut tunngaviusimapput Naalakkersuisut Nukissiuuteqarnermut aamma imermik pilersuineranut immikkoortumi pilersaarutaanni ilaanerannut nunatsinni erngup nukinganik iluaquteqarsinnaaneranut anguniakkanik avataaniittunik soqutiginnilersitsiniarluni ussassaaruteqartarnernut:

Anguniagaq 17: *"Naalakkersuisut nalunaarsorniarpaat nunattalu avataani susasaqartunik soqutiginnilersitsiniarluni suliniuteqarlutik erngup nukinganik iluaquteqarnissamik periarfissat suliffeqarfinnut nukimmik akikitsumik minguitsumillu annertoorsuarmik atuinissamik pisariaqartitsisunut"*.

Naalakkersuisut anguniakkamut tamatumunnga ilassutitut suliarisimavaat soqutiginnilersitsiniarluni ussassaarinnermi atortussat annertuut, Kalaallit Nunaanni erngup nukinganik iluaquteqarnissamut periarfissanik imaqartut. Suleqatigiinnermi Inuussutissarsiornermut, Nukissiuuteqarnermut,

Ilisimatusarnermut Suliffeqarnernullu Naalackersuisoqarfiup, Nukissiorfiit aamma Tele Greenland-ip akornanni soqutiginnilersitsiniarluni ussasaarutit ataatsimoortut ersarissaasuussapput iluaquteqarnissamik periarfissanik, nunat tamalaat akornanni niuerfiusumut saaffiginnittumik, erngup nukinganik suliffissuaqarfinnut siunertaqartumik iluaquteqarsinnaaneq pillugu periusissiap akuersissutigineqarsimasup anguniagaanut naapertuuttunik, soorlu qarasaasiaqarfissuarnut.

Atortussat pineqartut ataatsimoortukkaanik paasissutissanik imaqarput, inatsisit suliamut attuumassutillit, imermut tunngasunik kisitsisit paasissutissat - hydrologiske data, sanilliussisarneq – akileraarutininik aamma akitsuutinik, innaallagissap akiinik aamma paasissutissanik ingerlaartitsisarnermik, kiisalu inuussutissarsiornermut atatillugu ataatsimut neqeroorut taaguuteqartoq Doing Business in Greenland.

Kalaallit Nunaanni ilisimaneqarluartoq kisiannili iluaqutigineqanngitsoq erngup nukinganik iluaquteqarfissaq Nuup aamma Sisimiut akornanniippoq. Periarfissaq taanna assut naleqquttuuvoq suliffissuaqarfissuarmut nukimmik annertuumik pisariaqartitsiviusussamut, soorlu assersuutigalugu qarasaasialeriffissuarnut. Ilaatigullu periarfissaq taanna pillugu Alcoa kisitsisinik paasissutissanik katersinikuuvoq.

2016-imi Alcoa-p Naalackersuisut nalunaarfigai piffissami matumani aluminiuliorfissatut suliniutiminnik erngup nukinganik ilisimaneqartumik tamassuminnga iluaquteqarnermik tunngaveqartussamik ingerlatitseqqissinnaanatik. Oktobari qaammat 2016-imi Naalackersuisut aamma Alcoa suleqatigiinnissamut isumaqatigiissutiminnut atuuttumut ilassummik atsiugaqarput (MoU). Isumaqatigiissummut ilassut taanna pineqartoq periarfissiivoq Alcoa-p suliniutaanut immikkoortinneqarsimagaluartoq erngup nukinganik iluaquteqarnikkut nukissiorfiliorfissaq soqutigisaqartunut allanut pingajuusunut neqeroorutigineqarsinnaasoq.

Suliffeqarfinnullu soqutigisaqarsinnaasunut taamaasilluni periarfissaqalerpoq kisitsisinik paasissutissanik katersorneqareersimasunik atuisinnaanermut, kisitsisinik paasissutissanik ilaatigut Alcoa-mit katersorneqarsimasunik, allanut ingerlateqqinneqartussaangitsunik - non-disclosure - inatsisitigullu akisussaaffittaqaanngitsumik - non-liability – Naalackersuisunut isumaqatigiissuteqarsinnaanermut. Periarfissaq taanna pillugu annerusunik paasissutissat Naalackersuisut soqutiginnilersitsiniarlutik ussasaarinermik aqqissuussineranni ersippoq.

Naalackersuisut januar 2020-imi aallartippaat soqutiginnilersitsiniarluni ussassaarineq qarasaasiaqarfissuarnut Europa-mi. Soqutiginnilersitsiniarluni ussassaarinermit misilittakkat takutippaat ataatsimoortunik aningaasartuutissat kalaallini erngup nukinganik nukissiorfimmik annertoorsuarmik iluaquteqarnikkut qarasaasialeriffissuarnut assut soqutiginaruutut. Ilanngullugu aamma inuussutissarsiutit allat nukimmik annertoorsuarmik pisariaqartitsisartut oqaloqatigineqarput. Soqutiginnilersitsiniarluni ussassaarinermit suliat 2020-imi sulii ingerlateqqinneqassapput, tassanilu pilersaarusiortoqarpoq suliffissuaqarfinnik arlaqartunik naapitaqarnissaq.

Naalackersuisut piffissami matumani oqaloqatiginnippat misissueqqaarnissanut akuersissummik tunniussisinnaaneq pillugu, sumiiffinnut siusinnerusukkat Alcoa-mit atugassaasimagaluartuni.

Apeqqu 2:

Suliffeqarfiit qarasaasiaqarfinnik pilersitsinissamut ingerlatsinermullu suliallit qammarniarlugit Naalackersuisut suliniutinik nutaanik pilersaaruteqarpat?

Akissut:

Apeqquummut siullermut akissut takuuk.

Apeqqu 3:

Pilersitsiniarnerit taakku arlaat pilersitsiniarnerniit allaniit siulliunneqassanersut Naalackersuisut nalilersinnaavaat?

Akissut:

Ukiuni kingullerni Kalaallit Nunaanni inuussutissarsiornikkut atugassarititaasuni killiliussat pitsanngorsarneqartarsimapput. Taamaasillunilu suliaasaqarfinni arlaqartuni nutarterinernik aaqquissuussisoqartarsimavoq, siunissami ineriartortitsinissaq, annertusaaneq atugarissaarnerlu qularnaarumallugit. Annertuunik nutarterinerit inuussutissarsiornermi killiliussani, inuussutissarsiornikkut inatsisiliornermi, ingerlatseqatigiiffinnut inatsisiliornermi, aningaasalersuisarnermut tunngasunik inatsisiliornermi il.il. ukiut ingerlaneranni suliarineqartarsimapput naammassineqartarlutillu. Anguniagaasoq tassaavoq killiliussanik nukittorsaaneq inuussutissarsiornermik ingerlatsisooreersunut aammalu avataaneersunik aningaasaliisinnaasunik soqutiginnilersitsiniarneq.

Tamatumalu saniatigut Naalackersuisut suliarisimavaat atortuulersissimallugillu inuussutissarsiutit sammiviini aalajangersimasuni inuussutissarsiornikkut periusissiat, ilaatigut takornariartitsinermi, sermimik aamma imermik avammut

nioqquteqarnermi, suliffissuaqarfissuarnik nukissamik annertoorsuarmik pisariaqartitsisunik soqutiginnilersitsiniarnerit kiisalu uuliasiorneq aamma gasimik ujarlerneq. Siunertaavoq inuussutissarsiutinik nutaanik ineriartortitsinissat. Tamatumalu saniatigut inuussutissarsiornermut politikkimilaaavoq inuussutissarsiortunik suleqateqarnikkut nunat tamalaat akornanni niuernikkut sassartaartarneq.

Apeqqu 4:

Suliniutit sorliit ingerlatsivinnit qarasaasiaqarfinnik pilersitsinermik ingerlatsinermullu suliaqartunit piumaneqarpat?

Akissut:

Naalakkersuisut nalilerpaat Naalakkersuisut suliniutaat soqutiginnilersitsiniarlunilu ussassaarinerat imaqartut atortussanik qarasaasiaqarfissuit piunasaannik soqutigisaannillu.

Europa-mi niuernikkut soqutiginnilersitsiniarluni sassartaarnermi januar 2020-imi ingerlanneqartumi Naalakkersuisut paasivaat Kalaallit Nunaanni silaannaap pissusaa aammalu unammillersinnaanikkut aaqqissuussinerit assut soqutigineqarsinnaasut. Ilanngullugulu aamma Naalakkersuisut paasivaat immaqa pisariaqartitsisoqarsinnaasoq nalunaarasuartaaserinikkut attaveqaasersornikkut suli annertusaaqqittoqarnissaanik.

Apeqqu 5:

Naalakkersuisut suliamut soqutiginaatilinnik allanik paasissutissiisinnaanerlutik?

Akissut:

Naalakkersuisut sammisamat tunngatillugu ilassutissaqanngillat.

Inussiarnersumik inuulluaqqusillunga

Med venlig hilsen



Jess Svane